



Comme Sainct Iean, le Ciel estant ouuert, vid 24. Anciens, & quatre animaux, loians & donnans gloire à celuy qui estoit assis au Throsne.

SAINCT Iean regarde, & voicy vn huis ouuert au Ciel, & la premiere voix qu'il oüit, estoit comme d'une trompette parlant, & luy disant, monte icy, & ie te montreray quelles choses il faut estre faites en brief cy-apres. Et incontinent il fut rauy en esprit; & voicy vn Throne estoit dressé au Ciel, & y auoit quelqu'un assis sur le Throne, qui estoit semblable de regard à vne pierre de laspe & de Sardoine. Et à l'entour du Throne y auoit vingt-quatre sieges, & sur iceux vingt-quatre Anciens assis, vestus de blanc, ayans sur leurs chefs chacun vne couronne d'or; & y auoit sept lampes ardentes, qui sont les esprits de Dieu; & outre y auoit quatre animaux pleins d'yeux deuant & derriere, ayans chacun six aisles à l'entour; l'un d'iceux semblable à vn Lyon, l'autre à vn Veau, le troisieme à vn Homme, & le quart à vne Aigle volante, & ils n'auoient repos ne iour ne nuict, disans, Sainct, Sainct, Sainct, le Seigneur Tout-puissant qui est, qui estoit, & qui sera: & les vingt-quatre Anciens se prosternoient deuant celuy qui estoit assis au Throne, & l'adoroient, & mettoient leurs couronnes deuant le Throne.